

671.1238
078
125

永平府志

卷五十三列傳五名宦
五卷五十四列傳
六鄉賢一

永平府志卷五十三

列傳五 名宦五

國朝

張祺奉天蓋州舉人崇正十五年任遷安知縣時值流寇之亂設法守禦民賴以安順治二年升刑部主事轉山東兵備道副使

李丕著號愚公山西曲沃人進士順治元年任永平道當定鼎之初郡邑無專官公措置經理城市始治有法乘亂爲盜者許其投首自新招撫流離民得復業又請設寓學綏恤遠士立月課以示鼓舞凡有不便

於地方者不待陳控卽革除之士民感其鎮定安輯
功肖像立祠於南山之巔

馮如京山西太原鎮武衛人恩貢順治元年值開國
之初以本府同知擢用知府彈壓變亂招集流離申
請創立寓學以恤遠士革除明季陋規以撫瘡痍六
屬欽服士民愛戴其任灤也常革老人應驛之苦立
法攢槽至今賴之尋陞榆林道副使歷廣東江南左
右布政

侯一匡山西人生員順治元年任撫甯時當鼎革流寇
過境人心悚懼公素悉賊淫掠狀咸令婦女避暑中

關城賴以保全適我 大兵入關紳衿耆老遮道保
留 命賜冠帶公由此益自奮勵嚴守禦撫彫殘
減役均徭刑清政簡惜以樸直忤當事卒於官

李日芄字培原滿洲人生員順治二年任永平知府懲
投充革濫派吏不能爲奸尋陞霸州道副使歷官操
江都御史

鄭伸字行臺奉天錦州人順治二年任灤州知州推誠
待物一介不取時奉部圈田力護近城園舍晉大同
僉事歿祀名宦

張毓中字去偏號泊水山西陽城人舉人順治二年任

撫甯知縣邑當明末差繁徭重及包賠坍塌地畝錢糧爲民大累公下車清查逋數概請捐除流亡復業甫七月擢刑部主事百姓如失父母厯官陝西鳳翔知府

李中梧號燦宇滿洲人順治三年任永平知府厚重少文不輕顰笑居官廉明有威不避豪右有以鋤刃斃人久未成獄公命以穀草炙鋤血跡儼然乃脫無辜於獄坐實殺人者陞薊州道士民攀轅泣送自永至薊凡三百餘里絡繹不絕厯湖廣按察司

梁應元字仁吾遼陽人生員順治三年任盧龍知縣當

定鼎之初人心惶惑公慈惠寬仁鞠保備至士民愛戴之學宮傾圮公創造一新尋陞江南池州知府轉天津道

徐逢時字盛寰廣甯衛人生員順治三年

遷志作二年

任遷

安知縣當數十年兵燹之後公恤殘黎緩征呼重學校凡禮士愛民之事無所不至四年陞順德知府邑人感之爲立去思碑

劉應錫遼東人生員順治三年任昌黎知縣當定鼎之初人心惶怯公廉明慈恕加意撫綏人心始定陞大名府知府去之日民送如市

張文欽字君明浙江山陰人順治三年任灤州吏目潔
己奉公八載於灤去官日老穉泣送至日夕馬不得
行張飲數十里外信宿始克就道自來倅尉所未見
者

趙汲字學夫號潤宇奉天錦州人貢生順治五年任盧
龍知縣沈靜練達廉明仁厚政皆和易近人前令學
宮未竣公慨然繼成之時部議召買芻豆赴三屯備
行幸羽書旁午民間供應不及公乃給值鋪商以所
收米豆雇運不擾民而公事立濟陞江南泰州知州
王光晉字康侯奉天遼陽人順治五年由副貢生任灤

州知州明析秋毫簿書票檄不假胥吏之手後以卓異擢姑蘇太守

白芬字猗若河南洛陽人舉人順治八年任戶部分司剛果有爲御下明決嘗自謂云興一利不若除一害甫下車嚴飭倉庫有弄法者悉痛治之積弊頓清軍民愜服著四書幹選程墨以教諸生九年移駐薊州而永平餉司自此裁矣

尤侗字展成江南長洲人選貢順治九年任永平推官學識優長治政明決尤優禮學校因材鼓舞人文振興一時稱爲盛事以執法不阿調任去所著有北堂

秋夢西堂雜俎諸集行世

韓望字儼然陝西涇陽人進士順治九年任樂亭知縣
吏治敏達剔蠹祛奸一時萑苻不驚強暴斂跡擢戶
部福建司主事士民遮留不忍去

譚琳湖廣宗陽人舉人順治十年知撫甯縣下車卽以
興文教爲先甄別生童會課書院一切經費俱捐俸
爲之邑田化民女許字李得金之子因壻貧悔婚訴
於官公爲懲化民給花燭銀命女與李子成婚養濟
院口糧奉文裁減捐俸照舊發給未幾擢戶部去

王美順天昌平人貢生順治十一年任永平教授識見

超卓安靜有才幹凡軍民以事詰諸生者公收牒斥逐之封牒付本生令其自省時進諸生講論經史獎其所能進其所不及人以方李宗思常濬孫云

李士模字可庵山東高密人進士順治十四年任盧龍知縣才識優長遇事立剖盧邑無專志公留心纂輯以備一邑文獻約束胥吏不假辭色蠹弊悉除陞大理寺評事

宋琬字玉叔山東萊陽人進士順治十四年任永平道慷慨明決遇事立剖一時奸宄斂跡境內肅然增修府學規模壯麗前所未有又按八佾設樂舞生捐修

樂器以光祀典搜輯府志以備百年文獻所著有安
雅堂集秦州記異諸書調浙江甯紹台道尋陞浙江
廉訪使祀名宦

戴廷對四川中江舉人順治十五年任遷安知縣恤民
瘼除役蠹一切供應事措辦有方不擾百姓後陞湖
廣知府

葉矯然號思庵福建閩縣人進士順治十五年任樂亭
縣性仁恕體恤民隱培養士氣著有龍性堂詩集

石鯨字浪秋一字橫海湖廣武陵人順治戊戌進士官
灤州知州以剛直罷著有鷹來草堂詩鈔鯨性奇偉

七歲能詩官灤時嘗條陳灤賦役疾苦上觀察使度
支尙書允而未行有辛丑五月放歸留別兼投館閣
諸公七言長律五十韻歷敘牧灤及去官之由其略
云欲陳馮翊淒涼色不盡春陵疾苦詞請見三年敲
舊貫誰容二月買新絲幾番投匭陳觀察五次封書
上度支署考勞心同下下况加强項奉期期行春勸
稼公田穀薤夏初芟中谷薤直接王家湯沐邑失懽
舊邸門闌廝桂枝本粹安容蠹桑樵雖多不醉鴟自
刻鉛刀慚錯節毋勞貝錦綴成詩又云生來嘵笑原
難偶長脫形骸便數奇身世酒漿料北斗命宮糠粃

簸南箕又云偶爲明公校馬肆遂傳處士用牛醫故
人已被篙師誤太守適爲漁父欺自笑孤臣甘貝齒
敢云眾女嫉娥眉過蒙兄弟存班紉妄想君王乞敝
帷捷徑山林歸去好愚臣叩壑本來癡嶽嵴厯落獨
徃獨來可想見其爲人

節沅湘耆
舊集小傳

劉觀瀾洛陽人順治十五年任山海通判值悍卒狂逞
頑民影附撫御勞心卒於官關人爲斂貲歸其喪祀
名宦

張國猷密雲人順治十六年由貢生任灤州訓導軒爽
喜吟詩工篆隸行草書捐俸倡修學宮及明倫堂皆

堅麗改觀

韓國龍密雲人歲貢康熙元年任山海衛教授修理學宮殫竭心力

武紘周陝西延安歲貢生康熙元年任遷安知縣潔已愛民修學課士泣遷一載以逃人罣誤去官士民惜之

楊鳴湖廣安陸舉人康熙三年任遷安知縣賦性溫厚政尙寬平六年遷地被圉部檄撥任邳地以補之民憚其遠公爲力請於戶部得免後卒於官

戴萬象江西南昌人由吏員康熙三年任盧龍恪守職

司留心捕務不畏強禦厯事明決民賴以安

陳天植永嘉人貢士康熙三年任山海管關通判寬和恬靜事治民安至修邊垣修澄海樓修關志厥功尤偉

閔峻字山紆浙江湖州府烏程縣人拔貢生康熙四年任盧龍土瘠民疲地衝事劇公秉性廉潔悉心撫字勸諭輸將禁止雜耗力行保甲盜息民安編審持公不畏強禦聽訟明決獄無冤滯學宮年久傾圮公捐俸重修治盧五載考績稱最陞兵部職方司

錢世清字生一浙江錢塘人選貢康熙四年任永平道

公甫筮仕卽簪筆直廬周知制度典章沿革要務所
在居官忠寬敏惠廉靜端凝歷有聲譽其僉臬北平
也咨卹民隱崇尙儉約涖任數年舉凡屯田駟牧郵
傳諸大政以迨城郭學校倉廩隄圩罔不具飭一時
屬吏咸稱振刷焉郡丞梁某賠補官糧貧不能償以
鐫級解任尋歿於官公矜恤之代措千五百餘金得
歸其喪其生平盛德類如此周恤貧士鼓舞庶司孳
孳不倦凡祠廟載在祀典有關風化者亟修葺之尋
移任通州道銜加通永自公始辛亥歲

予告養親去之日士民攀轅涕泣如失怙恃議入名宦

祠崇祀

梁泰來字吉人江南壽州人舉人康熙四年任永平同知學識優長治政簡恕經理糧儲收授惟愼奉批詞訟公以執法署本府篆推誠待物廉靜自持留心郡乘延士修補時以厚重長者稱之惜用未竟以鑄級去

王麟圖保定人康熙四年任灤州學正性謙和急公慕義繼前任訓導張國猷修葺文廟及兩廡啟聖祠魁星樓費用不足至出家人簪珥助之

王文衡江南江甯人生員康熙五年任撫甯知縣修學